



KEMENTERIAN KOMUNIKASI
DAN MULTIMEDIA MALAYSIA

SIARAN MEDIA

SESI MENANDATANGANI MEMORANDUM PERSEFAHAMAN (MoU) ANTARA KERAJAAN MALAYSIA DAN KEMENTERIAN SAINS DAN ICT REPUBLIK KOREA MENGENAI KERJASAMA TEKNOLOGI MAKLUMAT DAN KOMUNIKASI

Malaysia dan Republik Korea bersetuju untuk membina hubungan kerja yang lebih erat dengan menandatangani memorandum persefahaman (MoU) mengenai Kerjasama Teknologi Maklumat dan Komunikasi. Sesi menandatangani MoU berlangsung di Blue House, Pejabat Eksekutif dan Kediaman Rasmi Presiden Republik Korea, yang terletak di Daerah Jongno Ibu Kota Seoul pada hari ini (28 November).

MoU ini ditandatangani oleh YB Gobind Singh Deo, Menteri Komunikasi dan Multimedia Malaysia dan TYT Choi Kiyoung, Menteri Sains dan ICT Republik Korea, disaksikan oleh YAB Tun Dr. Mahathir bin Mohamad, Perdana Menteri Malaysia dan TYT Moon Jae-In, Presiden Republik Korea. MoU ini merupakan satu bentuk kerjasama bersama untuk

memenuhi tugas dan fungsi masing-masing dalam perspektif pertukaran maklumat dan perkongsian inisiatif ICT yang saling menguntungkan.

MoU ini akan memberi manfaat kepada kedua-dua negara dalam jangka panjang dan meningkatkan lagi pelaburan serta memberi peluang yang luas untuk pertukaran teknologi tinggi antara Malaysia dan Republik Korea. Melihat kepada perkembangan pesat industri ICT di Republik Korea, perkongsian pengetahuan dan kepakaran bersama terutamanya dalam bidang ICT ini akan memberi tambah nilai yang menguntungkan kepada Malaysia. MoU ini juga akan membuka prospek penting bagi usahawan dan pemain teknologi telekomunikasi di kedua-dua negara untuk terus berinovasi dan memajukan teknologi.

MoU ini akan memberi tumpuan kepada bidang, antara lain, inisiatif ICT termasuk data raya, kecerdasan buatan dan internet benda (IoT), pembangunan kandungan perisian dan digital, rangkaian telekomunikasi termasuk 4G dan 5G, e-dagang teknologi, penyiaran digital dan keselamatan siber.

KEMENTERIAN KOMUNIKASI DAN MULTIMEDIA MALAYSIA

28 NOVEMBER 2019